

Аму йигити — юрт пешқадами

Мустақиллигимизнинг илк кунлариданоқ ёшларни мустақил ва янгича фикрлайдиган, замонавий илм-фан ютуқларини пухта эгаллаган, ватанимизнинг эртанги кунни, тақдирини ўз қўлига олишга қодир интеллектуал салоҳиятли қилиб тарбиялаш энг муҳим вазифа қилиб қўйилган эди. Бугунга келиб бу борада олиб борилган саъй-ҳаракатлар ўз мевасини берди. Дунё ёшлари билан беллаша оладиган, ҳеч кимдан кам бўлмаган ёшларимизнинг турли жабҳаларда эришяётган ютуқлари тақсинга сазовордир.

2019 йил 18 апрель кунини Ўзбекистон Республикаси Уй-жой коммунал хизмат кўрсатиш вазирлигининг навбатдаги кенгайтирилган ҳайъат йиғилиши кўчма тарзда Самарқанд шаҳрида ўтказилди. Йиғилишдан сўнг “Ёшлар маркази”да соҳа ходимларининг касб байрами нишонланди. Тадбирда соҳада фаолият юритаётган ишчи-ходимлар меҳнатини муносиб тақдирлаш мақсадида Вазирлар Маҳкамасининг қарори билан “Уй-жой коммунал хизмат кўрсатиш аълочили” кўкрак нишони билан илк бор фидокорона меҳнати билан соҳа ривожига муносиб ҳисса қўшиб келаётган бир гуруҳ ишчи-ходимлар тақдирланди.

Тақдирланганлар қаторида, ёш бўлишига қарамай, Қорақалпоғистон Республикаси, Амударё тумани Уй-жой коммунал хизмат кўрсатиш бўлими бошлиғи лавозимида хизмат қилаётган Санжар МУРОДОВ ҳам бор.

Биз Санжар Муродовнинг ҳаёти ва иш фаолияти ҳақида журналхонларимизга билганларимизни илиндик.

Санжар болалик чоғлариданоқ расм солишга, чизмачиликка қизиқар эди. Бу кейинчалик ўз натижасини кўрсатди. Мактабни аъло баҳолар билан тугатгандан сўнг, Қорақалпоғистон Давлат университетининг техника факультетига ҳужжат топшириб, имтиҳонлардан муваффақиятли ўтди ва шу факультетнинг архитектура бўлимига ўқишга қабул қилинди.

Инсон туғилиб-ўсган замин ва тарбияланган муҳит унинг келажагини белгилувчи энг муҳим омилдир. Чунки инсоннинг шахс сифатида шаклланишида атрофини ўраб турган яшил олам, у билан ҳамнафас яшаётган яқинлари, ҳамқишлоқлари, қолаверса, бир даврада ҳамсухбат бўлувчи ёр-дўстлари асосий ўрин тутди. Санжарни архитекторлик дипломини қўлга олиши билан Амударё туман ҳокимлигига бош мутахассис лавозимига ишга қабул қилишди. Ўз ишини пухта билиши, ташкилотчилик қобилия-



ти туфайли 2015–2017 йиллар туман бош меъмури вазифасида фаолият юритди.

Ҳозирги кунда туман аҳолисига коммунал хизмат кўрсатувчиларга бош-қош бўлиб келмоқда.

Сўнгги йилларда Амударё туманида барпо қилинаётган маъмурий бинолар, намунавий лойиҳалар асосидаги тураржойлар туман кўркига кўрк қўшиш билан бирга амударёликларнинг қулай уй-жойларга эга бўлишларига имконият яратмоқда.

Ана шундай муваффақиятларга эришишда турли соҳаларда фаолият юритаётган фидойи инсонлар қаторида ёш мутахассис Санжар Муродовнинг ҳам ўзига яраша ҳиссаси бор. “Интиланганга толе ёр” дейишгани бежиз эмас экан. Ҳа, ҳар бир ёш учун, энг муҳими, ўз олдига маълум бир мақсад қўйиб, интилишдир.

Ҳикоямиз қаҳрамони ҳам мақсади сари интилиб яшамоқда. Оиласи тинч, фарзанди улғаймоқда. Турмуш ўртоғи Фаридaxon ўқитувчилик касбини улўглаб, ёшларга зиё тарқатади, 71 ёшли отаси Отажон Муродов фарзандини ҳар кунни дуо қилиб, ишга қузатади. Қаҳрамонимиз ёш бўлса-да, туманда кўпчилик уни танийди ва ҳурмат қилади, ўзи севган, орзу қилган касбда ишламоқда. Дўсту биродарлари ҳаммиша ёнида. Йигит кишининг омади, бахти ва камоли шудир, балки.

Ш. РАДЖАБОВ